

道經

石林源上人寄巢詩序

石林源上人吾里中清淨僧也喜獵外典好苦吟每見必痛規之既歿篋中無片紙半偈深以為惜陸子較拈錄寄巢詩請曰源師亡矣夫子幸以一言存之余讀之終卷喟然歎曰嗟夫陸子閔源師之逝而假吾言以存之固不若源師之詩之能自存也世之知源師者渺矣盍觀其為詩觀其詩罕目疎節癯然而瘦硬如其人之顴孤頤削骨格峻嶒轟出於條衣外也觀其詩偏絃短韻峭然而凄冷如其人之琢冰嚼雪失羣啞羊而却食仰口也觀其詩耽思傍訊邈然而慘澹如其人之窮老嗜學吞紙以實腹而食字以飽蠹也嘗試與子摩挲遺卷旋目而思之扞衣反手巡檐覓句篝燈撥火抱膝孤吟風酸雨暗則壁蛩啁啾月白漏殘則梵猥呼應彼上人者鬚眉談笑顯顯然在吾眼中又豈待余言而後存乎杼山南嶽之徒不作紅樓應

制之俗習流染於緇衣其尤熾然者開堂頌古千偈瀾翻
陳羹糲飯所在塞屋此皆鳩摩羅什所云嚼飯與人非徒
失味乃令嘔噦者也寄巢之詩蔬筍也鰕魚也春餘之孤
花睡夢之清磬也標殘編於斯世用以息嘈囂警澆忍陸
子之微意又在於此往有比丘學詩於余余教以適山情
助禪悅埽除一切詩偈毒蜜以灰香淨滌而後可比丘笑
曰漢人適吳啖筍而佳問是何物曰竹也歸煮其床簣而
不熟語其妻曰吳人欺我如公之云人將笑我爲煮簣也
余舉羅什之言以復之且正告曰子苦吾之教子以煮簣
固也不尤愈乎教人嚼飯者飽嘔噦之唾餘而果腹以相
誇耶其人慙懼而去間嘗舉似源師爲破顏一笑并書之
以爲序庚子涂月十八日白衣友人蒙叟錢謙益序

寄巢詩小引

智林寺去虞城六十里高僧了通示現之處唐宋以來名

藍也石林源師少時習禪其中中歲有撓之者先君子爲
力解之已乃肩囊而去從事雲水所在稱寄巢焉師固卓
品受知於牧翁先生其孤情絕照著見於先生壽言傳銘
中余不敢贅顧其生平篤於交友與先君訂文字交歷三
十餘年如一日其懷贈詩有始衛波旬擾唯君力最强之
句蓋道其實也余髫時侍先君讀書願志堂師每過從談
詩講義移日乃去故余識師最蚤而師與余定交屈指亦
垂三十年已師好讀書工詩嘗類纂子史百家爲小碎集
而以其餘力注李義山詩三卷今松陵注本略採取之惜
未能流布其全書也其所爲詩甚富多不令人見雖酬贈
之作嘗秘篋中人不必盡知其高寄大率類此自丁酉順
世遺稿悉歸其學人文石而文石又已物化師之詩其不
爲廣陵散者幾希矣客歲有事於斯集從文石法嗣法具
搜訪遺集得詩幾四千首子晉毛子隱湖社刻又百餘首

彙粹採輯得如千篇分爲上下二卷請錢先生爲之序以
與杼山白蓮諸集輝映今古焉若其隱章秀句絡繹奔赴
如染霜孤店樹落日幾家村送友石泉寒不響山月夜還孤
病中野夫耕盡處漁子問來源謝耕鑿子孫在谿山筆墨傳
經沈石野寺風歸磬漁燈水聚星繞蔬對花師解笑酌茗
田故址我安心尋雪風月谿堂靜星辰水樹平夜過黃昏啼不
住終夜訴何名聽一僧歸寺晚小艇下溪遲題夜永孤松
月春荒茂草烟挽友寒暑衣縫葉春秋石種花山中澗戶雲
爲鎖松巢鶴墮薪謝一從沉醉死無復入山尋挽周浪跡
依雲住枯禪就石安答友曉霜園果熟晴日草花薰漢魏雖
更世朱陳只此村贈友何機最上叅無縫彈指將開悟有聲
霧中吟風蟬急絃相似鬧雨蛙繁吹不如寄友梵鼓聲寒祇
樹雨餅笙濤響竹鑪風誦羨魚理釣絲綸細隨鹿登山步
履強壽友花藥麗春鶯燕聚画堂長日竹梧稠懷徐根淺何

緣依淨地品微無分近雕欄草花去雁驚心聞角候故山人
夢憶家時贈洛中芳草一春宜鹿夢上方孤月盡鐘聲友
舛住者偶看飛瀑去來心應許白雲知友人不覩藤影蒼茫
垂月帶嵐光杳藹襯秋衣榮木弱燕初歸衝細雨垂楊新
起鎖輕烟過願名花遍乞秧新雨醉竹初移帶舊泥和友
故國蒼山時遠峙中峰明月夜孤清雪風波險處憐時
事山水緣中讓老身阮深山木客從來去未許兒童爆竹
祛夕坐中若有花光手一幅溪藤仔細模看其詞並有可
採不能惹置輒做中州集例附錄於此外有文集一卷多
著高禪隱衲之跡採僧傳者宜有取焉顧未訂定不遑付
梓姑以埃諸異日辛丑三月四日敕先陸貽典識

寄巢詩卷上

虞山 釋道源石林 撰

行春橋

一水渺無際如虹落彩長遠聞漁笛暮坐久客衣涼草樹
山流翠菰蒲岸送香更宜秋夜月圓映攝身光

光福道中

兩岸脩眉山色多一灣何處起漁歌沿流杖屨酬風日隱
谷藩垣滿薜蘿稚子賣茶經野店老人携饁上坡陀此中
覓箇爲庵地歲歲梅花飽看過

定慧寺

風霜凌道樹天矯鐵爲姿但見鳥來去不聞人住持古碑
惟斷石餘屋似殘棋雲水長廊者依然面壁時

寄載之

寡合世難住一生如野雲山川逢便去詩偈得隨焚學佛

宜從衆求通要返聞降心無外轉着意破魔軍

訪胡白叔先以詩贈如韻奉答

隔斷塵喧宛似村垂簾終日靜吟魂每教童子尋靈藥常
與家人話鹿門留客幾匙青餽在衛生一卷道書存朗吟
泛水瓢中句却喜都無斧鑿痕

郡歸過陸兆登園齋

冰解春晴杖屨還訪來幽鳥聽關關欲將吾意片言盡祗
恐人情一往艱疎瘦梅花當戶白小圓苔色上堦斑愛君
竹裏東牕好來歲詮經乞半間

過何慈公隱舍

隱舍築溪上席門風自關買書增舊業服藥駐衰顏棋局
閒花下藜床就竹間吾心無一雜過便說匡山

孫居士蕉庵

界外脫塵網此中堪少休形骸齊瘦石聲影落寒流嵐重

山常雨林高氣易秋。誰觀何者實。莫喻此生浮。

題蘭谷画

我解詩中画師能画裏。詩危崖牢置屋遠柳弄輕絲練白。常懸水花明不去枝。名山有此地願卜老於斯。

桃溪訪朗谷弟子

單瓢孤笠隱爲緣。自住桃溪又幾年。黃鳥啼花三月雨。烏龍眠草一籬烟。中齋滿鉢擎香飯。晚話當機試乳泉。見影聞聲多妙悟。須知立雪在門前。

蘭谷做元鎮画見貽

胸次餘丘壑。霜縑爲我圖。真堪元鎮匹。不與巨然殊。橫側神俱得。高深杖可扶。誰邊是愚谷。借以養吾愚。

採茶

少長習辛苦。巖巖路遠尋。計功多少葉。卒業雨晴心。怪有薑同點。憂他酪見侵。阿誰收焙好。陸羽是知音。

過雙塔寺

古寺迢迢入。凌空塔影雙。樹風流梵唄。蘿雨暗僧窻。佛火長明續。心魔半偈降。舊傳峰與徑。吾欲問諸方。

訪德先上人不值

曳杖到西郭。行行路復多。轉林高殿出。得听一橋過。我入同雲鶴。門關滿薜蘿。歸途愁日暮。將信付漁蓑。

丁卯除夕

匆匆四十二年過。前際光陰去較多。慧業未成時不與。白髭頻見志如何。地爐撥盡消長夜。瓦鉢敲殘和短歌。却喜明朝春入柳。東風吹醒舊枝柯。

和魏季常遶蔬菴詩之六首

地勝隣山水。如巢結個菴。就籬開小徑。任竹覆低簷。新墉梅偏瘦。初栽菜自甘。門前樵牧過。兩兩復三三。避世誠高士。爲園是逸民。菴居香不斷。春暖綠初勻。開牖

連東舍編籬隔北隣笑吟堪玩世曾不厭沉淪
菴外山山見畦邊日日鋤灌園人不作學圃意何如鶯轉
當吟罷花飛值醉初問津非我事一任老長沮
君是忘機者巡檐鳥雀馴已將塵世隔獨與道書親放意
托名酒移家從隱淪任嘲老圃去不作喫虛人
略存花草地都種芥菘苗時雨先勤薙山泉復緩澆遺僧
聊小摘防饑莫頻挑更結隣翁好添盤佐酒瓢
隣父晨相勞由來土俗敦西岡三戶在東崦幾家存樊子
甘爲圃陶公喜涉園平生交不雜恰稱掩衡門

牧齋先生休沐奉簡是詩

股肱爲國見丹衷持正無阿蜀洛同名忌衆中詩有禍身
歸林下退多功一生勛業元春夢畢世陶融是德風今住
耦耕容易訪烟霞分與笑吟通

立春

萬戶簾齊捲爭迎青帝歸春幡連瑞氣綵勝却寒威鼓角
鳴斑馬笙歌動繡闈無私爲歲首於物見新機

喜載之歸寺

不忘故山好重開竹下門向人分鉢飯與友乞祇園鳥息
馴旛影蝸行寫貝言一作說果知無
著翻經會絕言六窻今不動何處有
心猿

訪于司直時寓閭門道院

歷覽東南勝仙宮琴劍留春風爲上客明月醉高樓六竇
傳佳咏千金費遠遊時清操月旦准擬作陽秋

酬顧用晦

桂發別君時迢迢遠寄思秋吟蟲斷續宵夢鴈差池怕涉
風塵地憐存草木姿商聲中夜起猶咏寄來詩

寄陳良甫

別來鄉邑異欲寄尺書難細雨侵愁急深燈照夢寒吾生

從懶去君志以貧安借問東原宅今應竹樹寬

和文啓美佛日集緇素于香草垞賦詩說義

招來香草垞值佛下生期共信因緣事能修戒定儀宗雷
元善義持遠亦吟詩自舉蓮花社高風復見斯

題牧翁耦耕堂

世如棋局意多違猶喜桑麻土脉肥秀美山川將宅寄微
茫烟火有村依槐南夢後空勲業隴上身存少是非越陌
度阡餘好伴柴車應共夕陽歸

贈張醒公

七十無家累東西一似雲歲華蕭寺過詩卷世人聞薄酒
朝寒酌名香夜靜焚相期匡頂住問汝意何云

瞿稼軒先生東臯

丘壑由天設寬然清且幽波光排眼去花氣拂衣留竹暗
全迷路山明欲上樓聖朝稀諫事不礙入林遊

過錢履之

來去水雲跡相尋歲亦稀羨君高枕在媿我出山非垢盡
心無染清來貌不肥片言能契合不待構玄微

贈恒如關主

入海水無雜行空雲自如一關雖繫汝月印百川餘

禮散木和尚像

妙相何人筆瞻之肅我心坐禪今世影說法昔年音師吼
已無主狐鳴誰與箴吾生慚未徹涕泗不能禁

種蘭

歲種亦常度惜花殊費功慮垂傷葉上防蟻入根中不以
香無改而爲性苟容叮嚀鋤去客莫漫負春風

寄汰如法師

同學驅烏日分飛南北天喜師先出世愧我未成蓮明月
傳新句高僧續衆篇師著月明鐘詩百首及續高僧傳若憐焦敗種一雨

乞無偏一作道成先出世心悟早持蓮席繞五千衆詩傳百八篇小莖希一雨沾灑不應偏

寄蒼雪法師

萍轉不遑住愛師先住山縛禪烟磬裏集衆雪燈間一影雲俱遠惟心鶴共閒肯爲垂攝授勿致尺書慳

送駒孫法侶歸匡廬

出山忝學入山居去住因緣事可書斗笠道途涼復爾棕鞋天地濶何如峰歸五乳非驢乳地買匡廬有佛廬一片空明親證後塵沙無復擾其虛一作殷勤參請下東吳力爲伴久台藤扶力入山初息肩廊下同爲客乞食人間獨趁墟舊谷棲賢尋祖去宗風重紹五燈餘

七夕同奉倩行門集青霞池上以丘中有鳴琴爲韻得有字

宛似中散居廣池陰高柳賦詩推鳴琴看星罷行酒歡展達士眉閒落壞衣手晏坐情所嘉塵念我何有

二幢歌有序

胡白叔建石幢于華山中峰兩剎之前各鏤佛相妙極莊嚴過者無不瞻禮海內緇素各爲之頌真悉檀之勝舉也予亦作歌述其津梁無有窮盡云爾

幢兮幢兮不可名瞻之亭亭信念生空山卓立于萬年雖由斧鑿原天然佛光爲霞映山谷種種靈異曜心目愧我多生未出塵羨此殊因能薦福不知尋丈有頂齊兩道白毫西向飛天鼓空中問誰作以藥濟世知者希胡生去目復去情爲此勝業心地平兵戈永息世界泰風雷儼過諸天聲苔榮苔枯任生滅雨陰雨晴無斷絕嶺南嶺北人經過稽首松間問明月

贈契竺

道範自超著不爲塵網縈衣珠先世繫佛火竟宵明慧學叩諸老身名聞一生此方聞不礙通向耳根成

陪朱汝水姚君佐夜坐

群動中宵息熒熒燭影偏風聲搖獨樹霜氣入輕綿義取
銅甕析詩憑石鼎聯不知道社裏還有二君賢
過劉石君池上

欲識前溪路無辭畧約遙池香蓮未墜霜薄樹難凋竹蔭
移棋局童閒種藥苗画懸看逸品一幅雪中蕉
輓戒堂

幻盡性何去虛空影不真妄消冰後水身現界中塵香火
寒深院脩行紀片珉壞衣猶挂樹山鳥怨啼頻

贈自鏡

獨往道無偶知君意所從飽食西閣飯臥聽北樓鐘開卷
拈孤頌逢人話一峰歲寒操不改矯矯雪中松

咏柳四首

擲雨拋烟十里強柔條續續最輕揚一春青眼緣何事看
盡離人上小航

堤上春陰鶯亂啼樓頭雙眼望應迷垂垂不管深閨恨無
奈行人立馬嘶

三月春殘雪作花隨風高下遍天涯天涯人有還家夢夢
逐飛花易到家

長堤如画帶流鶯水面絲絲無限情記得去年曾過此輕
風落月送人行

復如庵居有梅一株蜿蜒曲折標格奇絕撫玩終日
不能捨去賦此紀勝

一庵隙地生梅叢折枝如鐵花蒙茸雪凌丰格自古雅霜
打意趣如磨礪清宵月炤發精彩寒春日暴添玲瓏桃李
凡枝未許並蕙蘭瑤草相爲容愧予枯瘦意有托想像兀
傲孤山中索笑巡行似訪道無言對坐真傳宗况乃主人
品不俗茗甌夜賞當鳴鐘欣然折花贈歸去燈光寫入青
芙蓉

晉陵姚筠心送公茂來虞因和鄭丈韻奉贈

絮飛花落又春移一路行裝濕雨絲遠送袈裟歸竹院旁
叅名理拜書帷身經山水能長健句染烟霞不費思白首
定交無恨晚投閒方外莫違時

和筠心同沈君樹公茂寶心遊拂水巖

崎嶇一路葛蘿攀澗草含花競破顏為鶴為龜湖漠漠
故疑珠疑雨水潺潺將心避世尋愚谷傾膽依僧話遠山
若問春申誰得似元作有春申結客剗青山之句莫過青眼看雲還

過友人隱居

有詩有酒恣君誇流水平橋第幾家六月涼風吹葛葉一
池香雨起菱花偶聽牧笛過原上閒把漁竿到水涯不見
武陵歸去後重尋往蹟已成賒

霧中塔

隱隱毘沙天外擎舉頭錯認闍婆城氤氳道氣僧常住柔

軟兜綿地涌生雲外露盤無見頂空中仙梵杳聞聲吉祥
風至陰霾失頓使凡夫肉眼清

次韻答朗谷禪弟二首

人去經年斷好音無端鵲喜繞高林吳鈞雪色鉢中見螺
髻霜華頂上侵偶倩素書傳遠夢正看紅樹動秋吟何時
共買山中地結箇茆庵了宿心

南響孤鴻覓侶儔肯為禪子作書郵勞君遠憶徵微尚誦
我新詩識舊愁霜下客衣敲斷杵月中隣笛叫殘秋應真
都向天台住為問攜囊去禮否

夢山

為賦塵區累千峰屢夢過風篁和鶴唳月笛引樵歌衡岳
高如許匡廬秀若何猶嫌餘習在泉石染神多

鎖桂

蛛網幽軒久未開一株巖桂小庭栽蒼藤翠竹為交去書

架禪床作伴來中夜月華沉色界前身金粟老香臺周遮
不許經時手留與秋風點綠苔

徐于王臥病簡之

風月關情年少時千金買笑買花枝于今夢雨庵中臥方
器方空着意思

曉行

殘月孤征外寒風吹客衣驚鳥掠渚去獨鴈逗蘆飛水浦
船開緩霜橋客過稀鷄聲荒店遠前路更依微

過大慈寺

夕照千山影寒空萬樹聲行行沙鴈下片片海波明禪理
論風動歸人趁雪晴廊虛堪面壁同役又催行

庚午元旦

天際孤雲不礙飛閒閒由我此生微客亭宇宙無今古傳
舍山河幾是非業寄薜蘿移石早寒餘風雪點梅稀一條

藤杖三條篾衡岳嵩山何處歸

雲半居

磴轉一峰上雲常住滿間樹高矜骨相石老卓容顏香盡
山初暝齋分身盡還坐深心不起塵點劫長閒

次感懷韻奉贈載之

結習焚香掃室頻墨卿楮客與相親寒花冒雨不經意細
竹含風別有神石上精魂尋舊夢波中泡影認前身儵然
微尚孤干鶴絕喜胸無一點塵

同徐伯弢遊三元道院

覓藥尋仙許共禪琳宮當住幾重天書傳真誥陶弘景井
吐丹光葛稚川符秘常函鞭石法棋收難算爛柯年日長
無事星壇靜好擁鉢衣拜上玄

夢醒

萬峰深處是吾家一枕匆匆日已斜夢覺殘書猶在手閒

風吹落滿庭花

東風

香徑名園習習來花枝處處候君開連朝芳草青于綬一夜垂楊綠似苔畫閣暗逢消蠟炬津亭偷度點銀盃輕狂粉絮休相助肯爲吹噓不暖灰

印虛遠公堂十六韻

金色諸天界空香起雜花悟心依練若護法遠毘沙珠網高涵月紅欄曲鏤霞渡河分兔馬入室辨龍蛇梵響調鶯舌池光吐象牙古盆供怪石小穿_法碾香茶烏几初勻漆胡床舊買槎觀機馴野象持呪禁鳴蛙夜走風簷馬朝粘雨砌蝸孤峰雖舊業一鉢且生涯道樹巢閒鶴禪枝宿暮鴉画筠猶墜壁題句漫籠紗無怖駝尸未忘言杜口耶竺文翻貝葉支品註蓮華旨得拳能豎詩成手幾义安心求法要常擬侍雙趺

和吳昌生贈王石帆

物我同根相獻酬野花爲圃石爲樓無猜鷗鷺溪頭狎不斷烟霞筆底收暮寺朝宮終月醉破琴空橐十年遊手披一卷南華註忘却加冠雪滿頭

哭徐于王

清麗生吟夢雨詩流風寂寂不勝悲江波舊路迎桃葉社草新題和竹枝歌扇舞衣拋影事暮雲秋月斷文思熱腸竟世無人識惟有花間杜宇知

湖上詩之十三首

法相寺

天竺中分路行行過別峰寺深低傑閣雲冷出幽鐘心在叨新佛身存識舊容高寒無限事氣候欲秋冬

玉泉寺

涓涓漱鳴玉靜寄本悠然水碧魚如画山寒鳥亦禪獨吟

殘雨後小立夕陽前會見醒心處呼瓢酌此泉

禮島窠和尚塔

巢在何株樹今人禮舊師別參佛法去始見布毛吹齒齒
終年石荒荒遠代碑復伸三匝意情盡敢云悲

吳山

登此觀無際錢塘撼怒潮山靈諸廟立城午萬烟饒仙訪
當年蹟風傳何處簫夷歌聽不斷接踵見歸樵

寒山

水路行無際逢山便有情雨晴非一色蒼翠自孤明塔老
荒僧屋雲竒結化城樵心杳相得清耳斧丁丁

放生池

蓮公仁及物頓脫網羅憂衆命歸生地群機聚樂丘此中
堪度厄他處勿輕投待汝生天日酬恩說舊由

方圓庵

獨行無伴侶過嶺聽風篁世古碑文斷靈潛井水香齋鐘
山雨急僧閣簾雲涼遍覓先賢蹟遺祠草樹荒

孤山

孤山清莫並處士隱相成放鶴當年事妻梅不世情雲陰
催暮雨春晚寄殘鶯我自無名客題詩不署名

禹廟

九州功績厚宮室至今卑大寶心無與方輿貢有規馨香
千古祀啟閉一僧司借問今何世曾聞會計時

楊莊

有埭將湖隔天生一段竒水亭雖素朴雲閣自高危柳偃
維舟樹花開礙杖枝任吾看竹去不要主人知

韜光庵

把杖入靈境因吟之問詩已欣群嶺豁獨倚一樓危海日
孤輪起江潮萬馬馳此中真絕勝登覽却忘疲

于忠肅廟

北狩當年事微君已不支
奪門功再立復辟汝孤危
赤膽懸天日丹心定帝基
猶存精爽在示夢決群疑

南屏逢故人

驀見兩相疑容顏各暗移
認聲方款曲爲笑復漣洏
骨瘦吾多病心安汝是師
卽今行路險聊取贈言規

春晚書懷

閒數春光太半過風花吹盡
又如何原頭綠上重重樹
天際青來遠遠莎雨意正愁
寒食近鄉心偏傍子規多
浮生底事隨時去搔首殘陽
獨放歌

夢愁山和尚

道心已去紛夜夢總息妄
四海乃趨忽群峰亦相向
登萊雖未遊牢山眇幽曠
驀逢愁道人鐘洪語音亮
披服紫加沙圓滿明月相
作禮通慇懃舉手復讚唱
喜聞法難思授

受鞋一兩根質旣荒鈍情性頗疎放
已能竟枯寂猶然抱
骯髒謾示雪山花先舉雲門杖
在覺遠知識到夢炙宗匠
賴有宿生緣都停業識浪勿以醒爲真
而將夢生謗斯夢
火聚同迷悟消萬狀

過葉季楚

緇素形骸自不同玄機微義兩相通
琴絃莫試叅寥醉詩
法堪師鄭谷工林際無多秋橘綠
逕中還見晚花紅
東臯舒嘯相攜去宛有柴桑處
士風

別二徐公子

濁世翩翩者無過二妙賢
清秋逢海上丙夜話燈前
故國橫寒雁荒林咽暮蟬
天涯重把手少別恐經年

牧翁耦耕堂

水榭山亭朴有餘相牛種樹案頭書
幾番膏雨桑麻長無
限春風桃李舒轉語肯拚輸
玉帶呼醅不惜換金魚
西隣

喜住松圓老耒耜能任得耦沮

重陽江陰道中

落日扁舟百里程高雲老鶴是平生初無橘柚人家熟亦有牛羊原上行穗穗沉波菰米黑斑斑照水菊萸明夕陽何處臺堪上便擬登臨奈獨醒

水

滔滔東去海爲歸是有神施挽不回灩澦險邊能上下錢塘折處互推排半天長白懸廬阜千載同清浸釣臺何事龐公吞未盡小分桑苧泛茶杯

次韻和魏仲雪新樓

歸來聊結看山樓叢桂高梧近素秋一葉焦琴冠後撫四屏名畫卧中遊尊前皓月邀能至社裏新詩醉可酬自有閒僧同倚檻禪機初話雪峰毬

載之觀可見訪不值途遇攜歸小坐

客過幽齋戶自扃仙禽不遣報相迎孤梅作雪香仍淺病竹禁風翠不成扶杖投山歸未晚到門握手話偏清呼童吹取松枝火窻底烹泉碧一泓

送蘭谷歸舊庵

別路依微水際分師歸能理舊松筠蕭蕭雨艇人行獨噓噓霜天雁失群春谷初將雙屐寄秋窻誰共一燈論囊空有底生涯事詩裏青山畫裏雲

伯弢北園梅花盛開值伯弢出遊予亦滯緣及歸花已如霰徘徊不能竟去感賦四韻

爭信梅花似雪開兩人何事失看來而今杖策重尋樹已早因風盡委苔東閣新詩空白賦西隣長笛不勝哀返魂猶待重攀賞小立殘陽忍遽回

次韻暮春閒居雜興

亭亭天際薄雲苦卓午酣眠懶上簾野菜如金雙蝶下含

桃似火亂鶯嘯落花好句春風入芳草閒情暮雨淹記得
一灣流水處疎疎籬落颺青帘

春日陸兆登書齋

湘簾閒白日主客話春容春入柳條重晴熏花氣濃空庭
招鶴舞細水聽魚喁只此林塘好何須住別峰

清明前二日同松雨泛湖

相與清遊事事便香爐茗椀亦同船名園欲作梨花雨遠
渡先垂楊柳烟脫餌雙魚驚棹去避人孤鳥隔沙眠淡粧
濃抹傳西子一樣輕風落照邊

送駒孫還廬山

千里從師作遠遊石頭叅罷又巖頭春帆片影江風濶烟
雨何堪獨上樓

卓穎載之過晚翠話久成詩

窓涵碧色晚晴天清衆依然似法筵作語不離三要外開

心直到五明前詩才比日逢靈徹畫品當時重巨然載之能詩

卓穎善画嗟我無成居老大齒牙惟說杲公禪

贈萬方士

術授崑山化鶴仙御風東向到吳天門多弟子求真訣座
滿公卿贈俸錢夜著銖衣朝上斗朝開寶鏡照妖猿蓬萊
萬里尋靈藥鞭石爲橋定幾年

舟逢牧雲時從天童問法初歸

湖激膠舟水潦時鐵鞋消息問吾師喝邊威力能明用杖
底風光合斷思旅泊奔流嗟我老孤峰歸歇待誰期忽焉
目擊離言說知見而今不立知

舟遇徐白雨

片帆江上雨疎疎手拓篷窓一笑初花事正逢三月盡客
情准別二年餘歸裝君自能攜句白雨初歸杖策吾猶未叩
廬爭得遊踪遍天下偉觀都寫寄來書

村居書懷

長日桑麻境自幽也因耕鑿漫淹留水花欲放此宜雨籬
豆初成未及秋林密有聲知鳥入天空無著辨雲浮半生
繭足垂垂老五岳何年汗漫遊

桃花

溶溶春色逞芳妍人面相同自可憐萬樹綵雲忙蝶板一
溪錦浪引漁船秦淮水渡歌爭發薛校書墳客忘還恍惚
花神來乞我剪幡從此護年年

過魏叔子齋書贈

世外緇衣者閒能問字過松聲清耳遍山色會心多交義
古當爾人情今奈何鹽車從若此慷慨爲君歌

朱汝水見訪客寮賦贈

稟氣傲且懶寡爲時所與隱遯樂巢由勛名薄伊呂誕喜
莊生書飢拾薯芋煮曠放適情性崢嶸度寒暑接人無新

條縛禪仍故處下堂逢王孫把手作道語心空無我人交
在便爾汝一見歡平生千秋復何許清嘯激簷花長言掃
霜楮高朗誦雅吟坦率得真侶邀君登北樓極目望遙渚
居此維摩室拈花散天女當續文字緣時時過幽序

訪屈道士

不識丹房何處通仙人應在葦珠宮南華善說漆園吏道
德當聞河上公瑤草入春無盡翠露桃含雨不禁紅坐中
忽忽身輕舉吹我蓬萊控鶴風

拂水山莊尋程孟陽先生

袖拂春風向深谷恍然如入桃花源巢松翹翹鶴友立上
樹淵淵鷄群喧耦耕之堂靜風日交開花下成名園泉鳴
琮琤勝絲竹芽叅玉版快食肉滿地莓苔吹落花鱗鱗簇
簇飄餘馥石枕方床事事幽山靜林深馴野鹿聞詠齋前
更覓君促膝喜聽高明言幽人面目洗塵土巖扉寂歷違

車轅齒牙有慧掣晉宋玉潤珠圓不著痕乳泉滴滴奪蒙
惠積樵墜葉爐聲細淪法能師桑苧翁清風颯颯生衣袂
紛紜俗諦安足論似契毘耶到真際畢竟庵中老淨名往
來不拒諸高弟

十松詩之三首

松月

長林影落偃蒼松此夜清光迥不同一片天風吹不墮瓏
瓏偏照鶴巢空

松聲

空外爲音出自然非風非雨亦非泉夜窓合與瓶笙奏此
曲天成何處傳

松雪

百尺蜿蜒似玉龍天風吹絮捲寒空庭蕉帶雪那堪竝畢
竟王維畫不工

北山絕頂看雪

去年冬日雷雨大今歲春陰雪作花一縣山川光可掬滿
城樓閣皓無涯琳宮我欲攀珠樹仙洞誰能拾素霞憶得
貧鄉有高士閉門僵卧卽袁家

偶成

一生曾未有津梁雲去雲來無故常身瘦似松存道骨風
清如蕙抱心香看書目健能終卷作賦才疎不滿章倚箇
蒲團消歲月觀空何處著圓方

湖上逢鄭山人

頭陀惑可斷塵沙頭陀人形犯斗能乘八月槎仙液恣中干
日酒牡丹頂作一枝花金銀變化能拋海山水高深久別
家我亦如雲無住著隨君訪岳到天涯

次和友人賣歌童

鏡中銷翠畫銷屏綠鬢絲絲白數莖樂爲賞心求碧玉贈

逢知己脫青萍春鶯不復和金縷庭鶴依然舞雪翎可惜
一生心力盡曲成無誤博誰聽

張伯雨墓

君画君詩每見來錢塘山下墓門開幾分隙地連桑麥三
尺殘封冒草萊之水似留符篆在仙禽不見羽儀回樵人
猶說長生事尸解憑今只浪猜

挽承天玉涵

不染蓮花性人間僅一來僧龍居上品義虎屬通才花落
晚風怨草晞朝露哀影堂香袖入化後挹風裁

送葉羽遐遊天台雁宕二首

聞爾天台去應將瀑布尋石梁孤度影山鳥靜談心拾得
遺詩好豐干舊住深依然劉阮客採藥入仙林
雁宕超塵界慙慙訪應真野僧俱道貌樵客卽高人攜杖
從遊澗擔囊受句新歸來問名勝不惜話兼旬

兆登書屋

入見人危坐牀書復整嚴梧高風掃徑花暝雨垂簷小閣
從雲閉殘棋按譜拈此中堪借榻欲取二楞淹

答孫惺如

出家心未悟重作出家僧林壑今應得雲天去亦能辛勞
皆毒藥寂滅也春冰此二吾兼脫何難續慧燈

寄月帆

問法從真友天涯亦忘歸潮聲聽鄂渚雲影辨江磯暮雪
心無改寒鴻書正稀殷勤將五字吟徹一燈微

畢詣過寄巢

破屋當疎竹鐘消過阿師欲潛無問世爲道不言詩示疾
含霜色留癯對鶴姿至人其息踵發語有深思

贈清池

定愛雙峰住翛然遠世人殘經持盡月一鉢應諸隣不競

心曾牧長吟句有神誰爲許都講來過竹房論

答姚仲銓見贈

深壑自孤往能成世外知得書梅賽雪作贈柳如絲月滿
思君夜霜飛去夢時敢期茅屋下相與賦新詩

壽孫惺如

不將身世繫虛名澗戶山亭竹樹清案上醒心多貝葉花
間說法有春鶯晏梳華髮絲絲短靜對浮雲片片輕門外
舊巖仙侶在石羊踪蹟問初平

訪曹池不遇

入市喧卑極此中人跡無靜房雙樹出寒鳥一林呼四壁
牽蘿暗危幢立鶴孤德雲名滿耳相見別峰圖

五之同寢虛袁卧生過寄巢

法侶相攜過靜寮四和清味話中燒庭香細細梅吹雪壁
影疎疎竹弄潮疑義下籤殷浩問道心違世晝公招遺雲

乞石皆幽事城北城南莫憚遙

衍門客湖上聞將住銅坑因寄

湖上還山願不違日歸遲爾及時歸東村稻熟無憂餒南
浦荷收足製衣竹笋正香茶後煮楊梅初紫雨中肥朗公
肯念無依客遺我緘書說道機

寄劉虛受

道合旣爲友詩新難與論理通台院教僧重沃洲人衣下
珠能示途中客不貧向云精大部肯說放光因

題吳伯起煮雪寮

吳市有真隱所居門巷幽春歸花木秀客過茗香留樵信
惟貽藥僧書每訂遊筆床隣釣客塵尾接玄流絃慢琴張
月縑橫画入秋是居寬數笏無觸類虛舟窓下鷄能語苔
邊鶴解搜貧宜彈劔缺富豈算牙籌瘦骨唯餘傲雙眉不
挂愁高寒名行在煮雪信君優

畢詣見訪有贈

愛爾孤峰客能來訪竹房乍看禪貌古便識道心長牧久
牛無跡調多馬脫韁眉龐知臘富莫復問年光

酬翁善吉見寄

談經論義許班荆竹色松心不世情慧業也應增晚歲勳
名早已著前程山中芳草招鳴鹿花裡春風待聽鶯能解
六如無一實所觀咸似闍婆城

食蓴

千里湖非遠因嘗此味多道流分供至漁子蕩舟過脆美
流匙滑甘芳入胃和季鷹曾爲汝歸計恐蹉跎

孫惺如于北山鶯囀谷小築賦二詩題其壁

路入重峰翠杳冥愛君新構絕幽清當窻樹矮橫山影隔
澗松高落子聲朝採蕨薇厨味足春移花藥野香生時時
放眼雲烟外忘却人間榮辱情

谷名鶯囀境幽哉剪棘鋤荆一徑開屋裡琴樽徵處士空
中雞犬世人猜隣峰野衲携雲至隔塲山童送菌來爲學
何須尋白鹿此間元有讀書臺

和馮已蒼晚春雜懷之二首

春卽匆匆去陰寒恰似秋婆娑驚柳大零落任花愁不受
塵區累猶爲水石謀物情知我靜單燕語綢繆
睡起神能適閒觀物理微竹禽啼示暇槐蟻戰爲威水檻
鷗堪數花枝蝶自稀最宜新綠下掩映水田衣

訪西池禪老

道契初投處宗風竟日論入樓看古藏臨水悟前因不競
雲無意孤生樹有神威儀多法嗣嚴肅受條新

再訪畢詣

再見南中友相規卽是師對顏溫似玉說義細如絲踏破
雙鞋未遊行一杖宜明年台頂去還有石梁期

訪清池

爲訪禪機客迢迢過靜居身偷窻外果風落案頭書祖偈
抄無算台宗讀有餘護生心最切忍草積堦除

挽孫惺如

體析咸知得苦空平生踐履信心胸涅槃山頂今先去生
死流中更不逢何日再經三笑處有身都付一燈風道交
往往多霜露寂寞當年立雪翁

牧翁山莊

西巖盡處有靈區王李名園得似無百尺飛泉空谷應幾
株喬木古藤扶列仙洞府連烏目舊隱山川著尚湖細讀
主人秋水旨望洋應自笑吾徒

題虎丘慧日篆書金經

蝌蚪纖微見龍蛇變化分秦言通梵字古篆集靈文習誦
期真果宣流布淨勳法同金體性入火不能焚

同陳玉立賦徐巢友玄洲十三絕

桃花庵

花發春風中溪深斷行旅聖世非秦人勿要漁父語

玄洲

一水隔凡境中有群真居我是逆流者亦來求道書

玉曆步

聞之上古人都忘記寒暑來者問以年笑指花開處

清隱碑

青青檀欒枝寒暑不改色中有一徑開苔印高人跡

石雲洞

可贈復可煮其白同於絮或化仙家羊繞洞成群去

晶閣

前後有仙賢名姓合一晶精爽俱不磨風儀各表表

仙蹟館

華陽上昇年始立此豐石盤螭高巍巍歷記成仙蹟

浴臺

危立水中央鷗鷺日依止群狎仍忘機一日來去駛

方諸峽

滴瀝如貫珠光影自明滅何人來洗心樂聽聲泱泱

峻亭

片地差可耕土膏任桑穀繭成纈雪絲稻收春白玉

芙蓉坡

翠葉跳雨珠紅光映霞爍亭亭洛水神回風何綽約

苹香砦

谷深無人行冒徑蘓蕭綠居者不亂群日午自呼鹿

忘磯

閒閒漁父磯左右見鷗鳥取玩非我心來去自昏曉

山莊新泉

醴泉流出本無源百斛明珠激石圓雙耳何妨聽永日一心不待洗今年潺湲似助談鋒活甘冽應教茗事全餘澤會將煩渴解商家霖雨未須專

和顧默孫孝廉寓開元寺八首

祇樹足消暑重陰護法雲移花聊慰客種竹便呼君月色身孤領鐘聲唄共聞不將蘭作珮自有戒香薰

此地有佳勝滄浪亭作隣世情違冷暖僧貌見清真半偈詮微妙浮生省屈伸明珠衣繫在客裏莫言貧

徑裡蒿萊滿依然仲蔚荒友尋多不應書答正須忘名向僧中截年觀局上長一燈神愈寂無復夢歸鄉

寺愛西林勝來居青豆房煮茶然獨影補竹寫清光出戶尋僧晚移舟載石忙每將書債理直欲典輕囊

閉門如拒客觀象爲調心佛理明花果禽言變樹林法音聽去水淨色看遙岑不隔牛鳴地論詩一互尋

愛此僧窓靜能消筆硯閒新篇傳洛下流譽滿人間遊事

思衡岳宗風話徑山早曾通不二無復問重關一作寺住

同鷗聚閒空香旋繞際佛火笑吟間黛色遠湖樹青螺平野山西軒恣延眺白板不須關

風定孤花落雲流古殿陰硯香吹竹粉書綠展蕉心磬寂

行堂晚燈微會境深樂聞禽說法和雅樹間音

飯後經行去漁師問水梁自依蘿桂住不醉柳花旁僧過

雲分餉鐘消月滿床鄉書寫遊日應半說吳閫

閒居十題之二

曬經

曬帙候晴日紛然走蠹魚雁排多佛說鱗次五天書殘闕

隨篇補昏愚仗力除生生居學地捨此負吾初

養花

紅白無多種軍持作供妍攜來先喫水乞與漫裁牋就燭

臨屏画隨風點硯田當知拈笑處祖意本無邊

懷友詩之十七首

陸兆登

始衛波旬擾惟君力最强更期吟讀去常有集刪忙山鳥

悅池影野蜂尋硯香悠悠誰足竝千古道風長

黃子羽

歲歲情如故相遺書不忘雨鳴思夜叙葉響念秋涼膚瘦

工行藥神清便捷床養生君所慕中散論偏長

徐于王

心以名為幻情因癡更多放遊春得伴行樂夜徵歌忽忽

病如此年年瘦若何愛聞提醒語齋閣候僧過

孫惺如

平生寡聞見得爾共談經謔語兼風雅微言吐性靈桂蘿

通澗戶樵牧叙山亭名弋何為者雲鴻正杳冥

陳良甫

茶癖同桑苧能詩似子昂
廬幽修竹滿路折好花當高枕
卧梅雨古題吟草堂相尋來往數童子戒迎將

蒼雪徹

威音通法界清範在中峰
建立惟神鬼來趨總象龍空山
經唄靜高座講論雄度我無嫌
晚殘年學種松

柴紫時

縛禪心止水講義口飛光
以法開群昧如燈照十方座頻
嫌塵短定久訝髭長借問傳衣者何人偈在廊

道開倚

南往叅依遍因之解益深
雪峰芋作飯寒夜楮爲衾五字
能搜玉三車不載金問師窮住處蕭寺說江心

蘭谷恒

以画爲遊戲氤氳水石神
尋幽幾兩屐數息十年身一句
中無死三衣外總貧晚爲詩亦好緘寄每清新

錢牧齋

南山雅望自巖巖飽歷時危與世艱
人謂李膺仙莫並帝知蘇軾睡能閒
朝清詩禍欣無起俗厚民情望早還
自媿不如僧卓順持書千里慰君顏

周云治

未除何肉與顛妻能自安居斷慢疑
對月拋書呼昔酒見鴻脩札寄新詩
依僧講席過堂早應辟名州入幕遲
最惜叅公先報盡室中揮淚鬢成絲

黃奉倩

公車不就鬢將華贏得詩名到作家
時買漁竿心在野卯酣法酒面生霞
山行迢遞童尋藥身計蕭閒自種茶
看取里門朝夕變好來相賞仲殊花

李孟芳

賓幕爭迎起應遲種松剔石更論詩
春風舍外梅花發夜

雨籬根菜甲滋北谷啼鶯傳密樹南窻巢燕落香泥一編
無復憂生事喜有東山謝傳知

孫本芝

雁行簪組見謙光喜對緇流話定香春宴一家棠棣宅民
歌五袴荔枝鄉斗間氣異文章貴札裡情深語句長知汝
此心無物累幽蘭餘馥肯分將

周安期

客裡逢君面似霞千言一掃筆如花期登雁宕書頻至想
醉虹橋酒漫賒與弟對床談夜雨逢僧烹乳鬪春茶吟壇
飲社求爲主何物齊師廣大家

五之目

不涉生緣學地間光陰常惜誦持間儀通四教神深染心
憶雙峰夢獨還衡岳有因資宿世塵區無跡下重關新鈔
曲暢楞嚴義辨見應知不汝艱

自勗遠

自憐絕少住山緣愛汝巖居卓錫泉濤起長松雙耳徹月
明清磬一心傳蓮花了悟香光內貝葉窮翻結集邊畢世
不爲名字者受圓無犯一作長僧年

次韻已蒼尚湖卽事二首

行役衣裳怯露風歸湖興緒滿飛篷稻糧我老鷗鳧外簑
笠誰同烟雨中世事空花雙眼白村容霜樹一秋紅多君
不賦衡門住貴客何曾勝釣翁

程程快意得雄風濯足滄浪倚短篷蘆荻著花霜影裡菱
荷落子水聲中孤雲遠鳥微茫白落日寒山掩映紅最愛
玄真唱西塞幾曾垂羨渭川翁

慧日寺訪顧孝柔

結椽西寺內梧影一窻收酒盡從人乞詩成向我投年光
消局上烟雨看峰頭不是閒尋訪多因問字留

白堤

路入山塘半堤名白傳存危檣連客舫獨樹掩僧門裘馬
逢春月笙歌屬寓園西尋武丘寺塔影見孤尊一作秋入
黃花岸霜

歸紅葉村荒祠有
行客若個薦溪蘩

蕭伯玉大行來遊虞山交分甚得奉簡四韻

雲情鶴影兩優游每遇名山暫一留看竹有園爭下榻思
家無月不登樓經從長水通玄理文擬昌黎墜眾流丘壑
同心復同好遍搜名勝並車舟

園鶴

一滯林塘影空存霄漢心每驚中夜露常和九臯音顧羽
仙期近分糧主惠深碧山歸不得籠繫作凡禽

贈屈道士

庭養冲天鶴宮存禮斗壇調笙吹法曲封鼎護新丹日月
閒中得星辰象外看曾聞當露坐腦滿不知寒

霜葉

遠村霜葉比花枝分布紅黃別樣姿于祐詩媒成得未鄭
虔書癖寫來宜橫披洞壑晴霞碎落滿僧窓地錦施扶杖
過溪看不狀明朝還恐朔風吹

寄熙遠

時採木蜀中

歷徧崎嶇入蜀難回盤鳥道極高寒秋宵獨聽猿啼急巫
峽遙看雲影繁萬里橋登車馬接百花潭步草堂寬期將
山木乘春水早證賢于建刹完

遊東臯

郭門東去有名園竹木蕭條又幾年國事不閒王給事人
情只羨李平泉春光滿眼花爭放翠色侵衣柳自眠禪客
坐來機不起鷗鳧安便水中天

智林寺十詠

了通

逆行曾現辟支身一世沉酣跡混塵末後異僧垂識語火蓮一句太驚人

火蓮

闍維具骨尋常事靈異欽師舌本存宛似紅蓮成七葉寺中留供醒群昏

古碑

一通文字駁重苔是記前人德行來繼者寥寥今不作過人摩讀便興哀

雙樹

乾元人種已千年飽歷風霜勢倚天若個頭陀曾一坐至今高影落閒田

古栢

蜿蜒柯幹渾如鍊盜鋸無傷神護存歷盡歲寒僧臘似青靑長覆古山門

山門

一梁為力百梁承構就公輸故有名唯此一門稱解脫脩行都向此中行一作過客莫將精巧辨修行只向此門行

浮海佛

色相莊嚴不易求千鈞一羽海中浮當年靈異無多子却引今人禮未休

聖僧墓

聖僧靈骨瘞其中只立峗幢不用封樵牧經過俱下拜豈同磨劔漢幽宮

香燈石

長明一盞殿中懸石性空靈祖脉傳何事無情先得法至今光續有千年一作無情說法亦常然何事心燈獨爾傳畢竟阿誰齊返照光明相續百千年

自鳴鐘

洪鐘待扣始能鳴不扣如何亦有聲會得法緣塵刹說笑

他空報蜀山崩

王蒙倪瓚和陳惟寅姑蘇錢塘懷古詩六首病中展
玩詩格清逸樂爲之和

峩峩吳山隈三年築成臺今多麋鹿遊昔曾西子來何須
百代去轉眼俱灰埃

昔賢歸冥漠精靈通有無題詩石壁間恍惚聲悲呼青燐
散高塚野草徒荒蕪

泠泠鶴澗邊云是貞娘墓花落歌舞來霞綉羅綺露有客
弔芳魂惆悵殘陽去右姑蘇

金人逼河汴一朝遷帝都南嶺遍甲第西湖誰釣徒往代
不可問千載空啼鳥

江湖八月怒估客舟難行浪白子胥馬誰能知一生霸氣
有時盡越山天外橫

湖山有佳趣隱者居其間種梅逐年盡放鶴何時還高風

自可想往蹟誰能攀右錢塘

病中七絕句

稜稜餘病骨鶴瘦不能支兀坐無生氣非干解息機
身安樂有餘病擾苦無已何事留根塵依然戀藥餌
神清夜不眠雙目自明暗夢遠黑甜鄉水中魚可勘
景物固無恙中秋仍及期月色有時滿人病何難離
策杖立原野涼風吹我衣欲眺不能遠怯怯心魂飛
病後入荒屋草樹光逾青四壁了無礙恰似山中亭
籩豆摘爲羹飽餐抵藥石血脈條暢來熟習五禽式
屏石上人以荷葉裹米作飯名之曰荷葉鼎牧翁食
而美之作歌以贈因倚和焉

閒僧不爲利養困荷葉作鼎炊香飯此心由心無別傳日
服不休身愈健爐起青烟燒楮軸須臾觸鼻聞香遠不待
天人滿鉢擎白日正中食一頓略爾分人無有窮淨名神

變難輕論當日如來成道時乳麋愧弗同時獻方趾圓顛
上玉堂手持飯具相分方坐中一任盧生夢彈指炊成不
着忙孟盛頓發青精色石家豆粥王家惑仙飯胡麻還可
逢佛香吳米真難得金門貴客懷耦耕露葵水摘甘爲羹
偶然一飽過禁齋喜贈瑤篇金石聲如此常食香美溢便
令胸次榮辱失嗟乎此製非銅腥商周舊物難與爭得之
行脚休攜鐺

村郊卽事

翠竹衡門晚紅蓮秋水深隣翁閒採芰園果暗招禽曬網
漁人課忘牛牧子心物流雙眼內一一會幽襟

題文端文一笠齋

覆蓋何爲喻毫端一笠如僅將風雨蔽遙借水山餘世事
幾杵子流光滿篋書愧吾爲學地猶自不遑居

米南宮十紙說歌

古人翰墨誰經久顛仙作書真妙手肥瘦由來合程崔筋
骨從茲變顏柳造紙因緣說蔡倫黃麻曾寫蘭亭新河南
響榻未云貴淳化親模安足論展開光怪眼邊落始識張
顛爲札惡更論澄心製獨精揮毫蛇勢奔千壑十紙令人
知好醜求之堅緻今無有唯于絹素差久傳世間貴重金
量斗我忽爲君狂叫來筆墨飛動兼天才安得置囊擔負
去便向五峰終老住

次韻汰如紺泉

一與法流接涓涓異衆泉光含巖月小響答夜鐘偏解渴
無虛日回焦莫問年澄沙惑不現斷證也宜然

陸孟鳧司理赴任粵中奉寄十韻

宦遊經百越路說五千遙驛樹陰如回蠻花色似燒何賢
居大府得爾號佳僚琴瑟中和理韋弦緩急調柳漿酣亦
適桂蠹味偏饒餽飭枕生麩衣裳布進蕉廉清當道薦述

作衆儒要俸薄供抄史官閒樂和陶冰壺同濯魄寶鏡少
潛妖聖世掄才切知應早入朝

沈璧甫移居虎丘奉簡十二韻

初離滄浪亭移近短簿宅買隣何用多一好便勝百古屋
青蘿深烟靄日夕積滿庭多異花蘭蕙占幽格素琴本無
絲道書自盈尺客至談笑諧不惜酒一石出谷欣鳥遷採
香恣蜂擇勿羨雲巖人日厭酒肉席偶值山下樵籍地與
之爽懷卷意可嘉彼此心不隔復有外方人頻來爲請益
酬對不憚煩早晚越阡陌

自勗新居二首

丈室師初住芒鞋我自來多途嫌鉢柄無火示爐灰苦自
娛黃蘗酸惟愛大梅草深門外路堂問幾時開一作談鋒
火示爐灰腹篋挂黃蘗林香熟
大梅飢禽猶未下新設施生臺
閉門喧不至日誦五天書懸壁閒瓶錫開畦雜蒹蔬宗風

窺雪竇蓮社憶匡廬旁有寬然地應容小朗居

莊樂齋中逢王山子

去去如雲水經年談笑違偶過修竹徑一作獨攜同款故
人扉玄論重聞晉新詩輒勝韋一作白社相爲惟餘貧似

舊寒暑一鶉衣

送已素南叅

烟水南詢志未休前程不懈是真脩江關曉發聽鷄度野
寺宵歸趁月投記蒞最先根自大傳衣莫後偈須留他年
問汝誰宗旨燃臂應將法乳酬一作烟水南行學未休別
乘風渡野寺聞鐘趁月留慈氏開門身入未文殊
摩頂臂加不忘言了悟指非月一轉何須語合頭

夏雲

何山觸石出奇形如馬如車不可名載雨炎洲蘇庶物移
陰火宅覆蒼生去來有路迢遙見蒼白無心變化成最憶
柴桑詩句好峰多恰喜是朱明

同陳玉立黃奉倩徐杲若訪天童老人因登玉峰

同參了悟復何云來看晴峰眼界新文字快論君有旨丘
樊未寄我餘身春風花氣侵禪帶澗水波光照客巾喜共
宗雷歸結社誓脩三昧托真因

明發堂晤屏石上人呈牧齋侍郎

偶尋林下喜登堂紫燕喃喃語畫梁相好瞻來皆具足機
鋒轉處不尋常氣吞香象曾傳法頂秀靈峰欲放光叨比
叅元兩無媿風流俱挹長公長

喜道開住禪興

此中龍象久無人祇樹依然抱古春淨穢重分由寶地慈
威俱現有天神傳心是一非南北住世無他自主賓謾說
辛勞能起廢更看留後渡迷津

哭載之

一身無處著忽作夢鄉歸卷上存詩少徒中受鉢稀舊房

垂夜語荒徑草秋肥颯颯風鳴樹高枝動壞衣

挽五之

汝主名藍地規清衆不喧遇人無法說對我以心論早托
蓮花國從拋葉貝文篋中篇什在一讀一驚魂

登烟雨樓

落帆一上偶成遊樓櫓峴峨映水洲狎客鷗群頻自下隔
波漁唱正相酌風濤怒捲經龍窟景物清華敵虎丘星月
晴明可娛樂不煩烟雨動人愁

遊楞嚴寺

銅爲靈像妙如如想象毫光說呪初紫栢留心存古蹟香
梨刊字印禪書十門無礙花相照幾院遙通徑自紆我欲
學行菩薩行此中莫有德雲居

題疑舫

齋居恍似倚孤篷雲影天光面面同日轉悟陰疑水動庭

鋪月白訝潮空檻飄花片連檣雨院送書聲撥棹風對卷
披裘燒短燭儼然寒雪剡溪中

桐鄉道中

不識舟車路惟行桑梓間一溪猶涸水百里始橫山寺廢
僧偏少官清政始閒暝烟村莫辨童子牧羊還

同王居士和東坡岐亭戒殺詩

好殺而覓佛何異石壓汁愍彼沒四生胎卵及化溼昧者
趨愈下異熟非外得諦視輪轉間箭射虛空急大則爲牛
羊小乃化鵝鴨人貪滋味甘心被無明羈飛走毛毳毼砧
几肉赤赤冤對自不知冥宰分黑白久留旁生中何能再
巾幘果報形影隨思之每飲泣須知性命同靈覺豈嘗缺
乞發大慈心引誘不回客必有高明流知苦速斷集

寄黃新都子羽

入蜀七千里一官行路難鳴琴知訟寡薄賦喜民安閣道

雲中見峨眉雪外看念衰能寄藥不減握中蘭

智幽庵化偈有序

若有脩至生法兩空則分別種現俱斷其視委化便如蟬
蛻矣邇有僧古貌龐眉儼若應化戾止吾虞北城之金童
神廟不知其何自也一日書牌云募化靜室一所卽於此
處化左題名曰智幽不數日坐脫其中里人欲以棺盛之
知佛法者勸信捨貲龕盛火浴俾合竺禮恭爲偈語贊之
碌碌緇素人逮化誰脫然周戲火宅內何能計其年彼美
應化真默證無心禪巡城不熟食隨寓成坐眠了然生死
際自在歸重泉不爲悶絕拘若與三昧連晏坐不傾倒容
貌如生焉自非工夫深百醜當發宣敬哉若斯人清淨超
諸纏里中饒信流龕覆以火燃骨與舍利同無乃金剛堅
亦足省迷執兼之祛妄偏萬死見一異安可無言傳苟有
心目靈覩此當勉旃

輓汰如法師

法匠云徂吾道涼人天無怙夜何長詮經幾部通慈旨傳
鉢何人續慧光忍草雨青披舊徑烟杉空翠拂禪牀袖香
不惜崎嶇至擇乳恩存拜影堂

宿破山寺

空山諸品靜深夜磬猶聞木榻何妨獨禪燈不待分僧餘
前世影夢冷舊堂雲明日高峰去逢麋不亂群

徐石臣幽居

席門背城陰花木自幽雅夙志敦琴書素心避車馬醉效
王公頽論傲嵇生寫妙筆圖雲煙遙情注原野懶與權貴
交自喜迎送寡小築聊葢茅絕省數添瓦曉峰連竹明夜
雨雜溪瀉如何桃源人應引釣魚者爐蒸楓子香茶佐蘆
菹鮓客述談劔篇僧約種蓮社高隱契清塵浮名付土苴
徑中寒菊存九日須來把

和友人樵雲二首

有葉樵堪採無心斧莫加萬層分嶺上幾片落天涯帶白
應炊飯連青謾煮茶逢僧寒瘦者贈與補袈裟
憑根尋有處就影斲無聲滿榼緣誰贈盈囊爲貢盛山青
將白界雨溼帶香行漁見相勞問君擔絮幾程

輓魏叔子

不識天何意交徂爾弟兄黃河送精魄白骨阻關城業薄
萊妻餒書多蔡女承里中遺慕在爭說孝廉名

輓養素

經持秦國本呪誦梵天音人作開山祖園成祇樹林漆身
三世久留影一堂深夜夜松間月依然照定心

輓壑雲上人

道範不重挹閒房空草青夜深沉月印天遠失雲形影相
留層閣神光觸畫屏西軒聊一宿不忍聽風鈴

陳玉立同過東林宿寄巢

與子同舟下遠江
茗花撲撲皎如霜
山城忽盡瞻靈塔
禪室如歸坐雨窻
清漏杳然從夜改
妙談良久欲心降
他年若憶題名處
記取庭前樹影雙

問汰如河公疾

緣周六種利生多
心血斯時損太過
既有病侵銷歲月
豈無禪定出風波
時飛一雨機應熟
語設三關驗不訛
自分輕微敢來問
爲探法要禮維摩

于司直客死留都作詩輓之

清羸殊所稟
北住有南名
客裏衣冠聚
囊中書劍盛
秋存離別夢
歲改死生情
六代烟花地
魂留亦自應

訪徐石臣幽居

我本忘機者
來尋幽隱廬
移花期雨活
插柳待風梳
稅地栽新竹
開囊出異書
自耽巖穴趣
不欲識鳴琚

壽戈莊樂

晚已知津莫問津
水鄉猶覓藕花隣
風塵不到琴書處
雲月偏隨杖屨人
二仲好來三徑友
一生閒過四朝春
青箱舊業傳應遠
豈待籬金始不貧

奉簡牧翁移居拂水山莊

延爽先開秋水閣
招朋隨築耦耕堂
碧油幔布藤蘿密
雲錦花開菡萏香
隔塢鐘魚連佛舍
當湖簑笠見漁鄉
平生富貴槐南夢
一枕風泉睡轉長

禮一雨和尚塔

曾殮法乳雨花邊
無染渾同出水蓮
衣鉢傳人誰上首
津梁疲日又何年
二楞立義三車外
雙樹流泉一奠前
惆悵寂光瞻不見
空餘棠樹有啼鶉

李孟芳新居北麓奉簡八首

竹可爲宮石作樓
澗花坪草逐門幽
種蔬蒔藥乃家事
拾

椽尋芝亦歲謀聞梵北來多佛舍招真南去有丹丘人間
浮艷都無慕案上遺編錄四休

寓形宇內盡勞生孰不輸君隱業成蜂採隣花添舊蜜鳥
歸庭樹換新聲名根謝去同雲懶家累消來共水清食可
百年麤糲去羞言蘇季學縱橫

舊住湖邊今郭邊捨舟攜杖兩相便曲肱小閣酣茶後放
脚西郊飽飯前斲竹爲竿營釣具逢菴送米結僧緣買山
還仗詩堪賣莫道明時不值錢

時事紛然足嘆嗟榮枯曾不到君家虛庭覆有重陰樹隙
地栽些雜色花蜃氣東浮樓閣變山光西爽畫圖遮任他
聲伎南鄰富只有琴樽閱歲華

鄰好相呼便結廬燕怡雀喜賀新居一間半厦乾坤大二
滿三平歲月餘茶煑旗槍蟹眼沸香添蘭麝篆烟虛床頭
經史從堆積只讀南華河上書

草堂門復設柴荆隔絕喧甲市井聲白集每開吟大夢陶
詩不釋愛閑情紫芝雨滴光偏燁瑤草春回碧漸萌看取
黃糧炊未熟夢中榮貴笑盧生

向辭羔雁隱多年屬意林丘取次遷菊候且憑鄰送酒床
邊未許婦堆錢談經香谷尋應遍炙手朱門步不前出岫
閑雲頻入戶候君設席作賓延

窓下新篁種幾竿陰晴烟靄拂檀欒衛公花木添新疏鄴
架圖書愜靜觀肆志有年棲壑裡閒愁無意結眉端西山
移過東山住水石家私愈覺寬

題盛伯含贈山居圖

丘壑襟期宿昔存一揮絹素勢雄吞紅侵幾樹皆秋色翠
滴重巖是雨痕樵客遠歸如有約釣船閒繫絕無喧雲光
遮隱高深處神往誰邊似石門

寄魏季常

客中一見便投詩別後寥寥兩不知風雨空山應剪燭茗
香清晝定圍棋秋時獲黍非無畝夏月漚麻自有池深谷
紫芝誰伴採可容樗散晚追隨

再輓汰如

失我蓮花友東方無導師詮經存逸帙講塵剩殘絲竹雨
生哀響松風起怨思弱翎曾被接何處覓禪枝

馮已蒼新有朋松庵

此地經多主今成靜者居老松歸獨鶴深水出群魚石罅
添新藥籬根種雜蔬向南圭竇在就月讀殘書

答馬人伯

別來纔幾日歲月恍然深春去紅辭樹陰成綠滿林顏消
丹藥少塵浩素衣侵看取庭蕉展爭持不盡心

題友石居二首

澗戶恣幽討移來石更奇花支香斷續蕚綴色淋漓翠滴

高難挹雲生靜獨知米顛重見此瞻拜也相宜

五丁移有力巧拙各天然橫側隨胸次猗猗著眼前彎弓
疑虎卧遇牧叱羊眠肯作園亭物秦王莫用鞭

中秋月蝕

月到中秋勝今宵正掩輝一從靈兔失便有亂螢飛河漢
形偏淡星辰象亦微天風如有力疾掃衆陰歸

五乳庵課山童菘梅竹

清友有梅竹當於隙地栽雪時花破玉春晚籜喧苔法要
茶邊說天心易理開任渠童子慧疎密善安排

和胡白叔寒山寺廢鐘篇

夜分鯨吼徹正屬客舟安頓廢千年物能供幾衆飡一爲
魔力便無復缺光寒張祐詩碑在重來不忍看

冬夜已素出示閩遊詩卷

寒夜同爐火孜孜話素衷已看人卓絕輒見句清工行李

歸吳下人情愛越中宛然風物在詳譜荔枝紅

聽香雪閣黎法要喜而有贈

不知真諦義次第問吾師長跪申初敬微言破宿疑身光
生白淨頂相見高巍法喜施甘露心苗已被滋

楊曰補過寺有贈

磬聲初起定有客欵松門盡授關仝法詩投靈運言西經
通貝葉楚草寫芳蓀問我山中意惟餘物外尊

遊秦坡澗

迢迢偶作北山遊勝事憑閒獨自求過嶺萬松藏古路避
人群鹿識丹丘飛泉雷動雲中澗絕壁霞明葉上秋隙地
可能分坐具茅菴結個好歸休

正公期過北禪賦此奉寄

一生雲水作行踪道就何妨涉世慵住地正從生處熟交
情應向淡邊濃禪心似月浮香水客意如雲落翠峰肯許

相依脩慧業願通三學豁心胸

張氏隱居

隱人與世了無求景物天成地自幽魚子沉浮安碧沼鶴
雛來去長丹丘垂簾讀易從年去與客投壺竟日遊門外
烟波西塞似玄真歌起見漁舟

咏香

次懶先韻

頗愛清恬意都將濃郁捐鵲爐餘宿火玉葉隔無烟薰處
初成癖消時似入禪鼻根曾不著一點徹無邊

餅花

同前

軍持成小供衆色聚芳叢十日閒吟裡一年春信中筆爭
毫末彩燭借幾分紅次第看開落溫泉別有功

華山三昧律師應長洲北禪之請四衆皈依法筵甚
盛陳玉立有詩志喜次韻和之

娑羅道樹長喬枝東引重陰覆導師狂歌已曾調白象義

宣錯訝語黃鸝雲開佛日中天際風便慈航彼岸時緇素
戒香聞馥郁白蓮重發遠公池

白椎菴訪聞照

求道能深隱精藍未易尋沿谿花見相接樹鳥談心北岬
聞漁唱東軒滿竹陰侍師如意下片語豁吾襟

喜逢古如

忽作二年別又逢花落時三花依舊國一鉢出荒祠莫問
紫衣事當言白閣期示吾冰雪句絕有皎然思

和雪輿十聲之四首

秋聲

竹屋宵眠枕簟涼有聲偏覺夢魂鄉不知群動緣何事總
爲秋來較短長

雨聲

蕭蕭瑟瑟不堪聞獨對寒燈夜欲分底事一般沾灑去焦

聞竹上每慙歎

桐聲

葉飄金井景淒其客思無聊聽不宜記得襄陽有佳句清
秋疎雨滴高枝

潮聲

如雷日夕撼行舟前後推排勢未休莫是子胥精爽在錢
塘江上怒高秋

壽馮猶龍

松菊徑存冠早掛夷堅書著卷偏多一生行樂多高會斗
酒關情卽浩歌北地蒼黃真可惜東溟清淺又如何今應
重結耆英社懷一匆匆亦願過

穀雨日毛子晉邀同雷雨津徐元歎諸君遊石湖中
道拜唐六如先生墓子晉議新其祠雨津有作次韻
奉和

樂與佳客遊薄言汎春水簫管坐兩頭聲音雜殊里解衣
容野緇兩岬紛紅紫艤棹登遠坳弔古散芳趾指點丘中
陵云有子畏子遺事詢野人齟齬失真似金粉存鴻文白
骨未曾死隔世成相知今昔能一視祠宇議以新碣石扶
所毀千載名各垂九原魂獨起寓形雖有涯流芳固無始
弔之巴人歌聊當絮漿醜

新綠

驚見盈堦色爭宣得雨心動搖風際影積漸夏初陰上碧
苔逾厚連青草更深依微彌處所行住拂衣襟

贈宗禪上人

雲水初無定招提在破山烟霞身動靜木石意忙閒法性
歸無本真心悟不還妙蓮何所染有愧淤泥間

壽文彥可先生七十

肥遁長依麋鹿群繞堦芳草雜香芸棄官早學陶元亮能

畫堪追鄭廣文樵客寄書勤作答祇桓開講喜先聞頻年
跂脚延西爽看取喬松自拂雲

讀陸勅先和鐵崖香奩詩戲贈

鐵篔才華君自饒平章梅白及桃天笑啼顏面緣情見細
膩風光儘意描丈室散花原不染漆園爲蝶肯相撩微詞
莫遣登徒見攬入君前短宋條

觀下潤甫畫

池南亭暖墨花濃平遠饒爲山水容竹過嶺頭飛翠鳳藤
垂澗底臥蒼龍夕陽樵下疑聞唱細路僧歸似聽鐘畢竟
仙家何處是縮身還擬入壺中

野香

發自開含內因風遠近聞非烟無處着似麝不關焚接水
園亭藹連山草木薰一通禪者觀未許蝶尋芬

贈林山人

十口餘家累曾無負郭田訪僧多醉日作客易經年劔缺
彈三尺詩囊置百篇話言真似蜜甜味滿中邊

逢徐伯崧

忽思前度別又復一年多再折秋河柳同看霜渚荷長存
無壽者不住怯流波縱有高騫志其如素髮何

將築

不虞松未長已愛竹先成設檻看山近爲窓借水明琴書
娛歲暮花藥待春晴愧我猶三宿須叅去住情

茶花

不共春花發秋來吐素明黃中含桂質雪表見梅情蝶採
頻交影蜂來却有聲堪爲寒菊友汲水一瓶盛

庭柯

月下陰難滿風前影獨披秋絲蟲食葉曉舌鳥傳枝值爾
凋殘日傷予老大時淡懷陶處士一盼以顏怡

早梅

萬樹寒無色南枝獨有花香通流水處影落小菴家神女
留雲淡江妃待月斜不生桃李候冰雪閱年華

尋潘處士

一灣流水遶幽居晴久呼兒好曬書園剖綠瓜消渴暑茶
烹紫莢吸清虛當門高蔭垂青柳隔岬濃香送碧蕖不仕
正同陶處士東林能過侯籃輿

戈莊樂新居

溪浮紅錦浣花同况復吟詩杜甫工人乞丹青圖不了隣
邀鷄黍酒頻中東湖水濶宜看月北岬涼多可御風筒裡
蜜脾供餅餌排衙兩度採香濃

謝臯羽釣臺詩

運遭百六大宋云亡隱潛麟鳳縱橫犬羊黎庶左袵瓦礫
上陽山河非昔民心遑遑踐履其地實惟感傷發丘何酷

骨暴如霜密約同志昏夜瘞藏樹以冬青恐迷其方念茲
靈爽輒摧肝腸時上釣臺追慕嚴光出見漢后不改故常
星犯帝座於焉流芳惜哉異世難逢道昌旣絕國祚孰維
皇綱伯夷不見薇蕨無香瀾瀾江水遶臺斯長悲歌擊石
地老天荒

答香雪閣黎

佳篇緘寄遠難和似陽春戒日收新弟經科發舊人山川
饒昔夢櫻筍及斯辰講有懸河辯心開遇應真

歸智林寺二首

四十年如箭重來物盡非厨寒烟不續僧老事多違幾箇
傳宗旨何人受信衣竹房曾未改只有草侵扉

故山蘿屋白雲多擔簦歸來意若何祇樹半凋餘歲月居
人皆老閱風波清涼有國持蓮偈愛護唯心佩牧歌舊榻
夜眠孤夢後松鳴秋露鶴相和

楊柳風

種臨官路影婆娑曉月紛紛拂汴河腰細楚宮金縷見春
歸吳苑雪花多易驚鶯夢枝無定忽斷蟬聲葉自接誰謂
笛中吹得盡白公還有斷腸歌

芭蕉雨

蕭蕭瑟瑟向空庭點滴聲多達五更能遣紙窻隣火暗解
侵茶鼎石泉鳴題詩深院難消怨焚稿西園未告成偏惱
離家孤枕客鄉心的的萬愁生

梧桐月

翹翹生長鳳凰枝影轉中庭夜靜時歸夢幾愁銀箭改吟
詩剛喜玉輪遲砧寒不斷人間杵琴冷難調指下絲底事
粧樓漫相向清清風露起幽思

梅花雪

一株寒素倚江隈五出花同六出開欲動也應留佩去不

移的是弄珠來異香薰透鮫綃服妙質粧成玉鏡臺早可
凌波迎月姊不教仙骨墮風埃

題畫三絕

武陵溪裡最深幽莫有桃花引釣舟寂寂衡茅人獨住捲
簾相對碧山秋

古木臨江江自流蒼茫客館楚荆秋行人策蹇歸何處路
入羊腸去不休

樹樹霜凋紅紫鮮醉漁看去信行船也應欸乃青山曲雙
眼能空萬里天

續懷友詩之十四首

顧孝柔

有兒爭赴公車業君自優游臥聖時絕俗襟期擅詩酒爲
人肝膽見須眉夏長枕簟留僧院夜靜圖書倒竹筍北谷
南湖好風日不知童冠幾追隨

魏季常

仲叔兩兄交最早季君今歲始過從谿山適意延幽賞鷗
鷺尋盟見素衷門櫬不開高樹雨簾旌微動落花風繞蔬
菴裡頻施榻也可燒燈夜話中

王山子

琳宮梵宇閱年華城市爲遊識酒家剩有詩瓢浮水上常
攜芒屨向天涯逢來樵牧皆成友到處園亭獨看花聞道
小山顏復少君雖晚矣可飡霞

來之源

袖香相叩我何辭每共論文夜臥遲行李雖留吳地寺風
塵懶作客途詩奉持不退心游道懸解非常智過師借問
何年歸峽去挈余西上訪峨眉

已素唯

蜀中風土問吾師叙述千言有妙詞萬里橋邊諸葛廟百

花潭上杜公祠南音解操五絃曲西意能參百丈規族姓
懶遊名利澹雙峰將住學無爲

仙籌屋

一身無著語叅微文字新靈總道機但聽禽鳴皆說法何
妨米熟便傳衣苦吟愛月松間照閒坐看雲石上飛他日
舉揚宗教去可容瓶錫老相依

巢修休

師資相信固多年由我萍漂便各天世外文章言外意畫
中山水定中禪林端析片皆香樹火內生花卽妙蓮碧嶂
青谿吾已得但來分住不須錢

澄寂真

雙蛾峰下竹房閒相過論文香茗邊開社肯沽元亮酒買
山揀用道林錢五天梵唱傳枝鳥一世清聲抱葉蟬往往
有詞才敏贍南華應叙最初篇

越凡期

同師入蜀採良材歸後隨堂學未衰指見舊標先得月口
談心義欲登臺三年行李雙肩歇十笏閒房萬竹開光景
留連多好句清華不讓九僧才

雪巖印

十年相識始投詩妙義叅承有幾師世上龍蛇將蹟混法
中麟鳳以心期水樓月落安禪外金磬風傳出定時竿木
逢場聊作戲不知誰伎更高奇

雪濤微

三十年修智度多力齊馴象渡深河當人善說傳三要忘
行無言聚六和庭樹鳥啼談般若窻花風散點多羅本來
枯木無春暖逢著燒庵未是魔

酉池果

寶坊伊始建何朝榛莽荒涼戶網蛸起廢欲將慈願滿破

邪能以性靈調智花得暖開香樹忍草逢春發慧苗記得
去年留一宿石樓寒月話深宵

天慧印

潛遊學海頗多時性相咸通去所知本末不存何有際初
中俱善始無爲揜關清晝雲安榻入定中宵月印池寄我
數篇名句在一生精鍊皎然詩

石鏡閣

所交無雜只離居每對玄言出秘書欲隱夢先遊華頂將
棲心已注匡廬攬衣花外聽黃鳥拋卷窓前落粉魚妙解
莊生齊物旨遶畦閒看蝶遽遽

題華山融公雲閣

火宅堪施雨浮來遍界涼橫邊添祖脈高處接空香隱隱
諸天近行行萬里長道人心得似閒適兩無妨

題沈石天画

志好無異趨但願山水足愛君通靈筆對此却三毒嶺上
風篁生波間沙鳥浴愚指冉家溪住想鄭子谷何人結草
堂衣冠非碌碌古春花爭紅長年樹餘綠童沽酒一壺架
挿書百軸靜地無風塵閒園滿松菊他年罷叅請類此覓
幽築學佛期通三如龜願縮六中有麋鹿群神魂每相逐
何白石以意縛筆精妙倍常友人子纔數歲便知愛
好白石與乃翁往復有詩因爲之和

向來高尚人無不有所癖嵇生柳下鍛米顛袖中石中郎
喜拂棋阮孚好蠟屐爭如君所爲意外精筆格健法宣城
工勁稱去仲甫適日蒔花竹餘歲課桑柘隙斫取林梢藤
洗剔蟲鼠蝕乃以刀規之比玉更圓白牢縛中山毫堅緻
僅盈尺作書勢乃狂画蘭姿太澤堪佐青雲士光燄發簡
策逢此寧馨兒器骨隸仙籍愛君製絕奇藏弃深致惜早
自欽高風迥與梨栗隔可望書法精兼作文章伯幸哉子

如此儒珍待登席我爲阿翁慶舉手一加額

訪石鏡不遇

理策來西院幽尋不遇師過墻梅早白轉徑竹多姿止水影偏照片雲心共隨夕陽明露柱默了動幡疑

天慧自吳門歸寄之

慧公倦遊歸深林喜匿影長避世紛紛愈覺心井井何如空中雲來往自嚴冷能出斷常坑兼超有無境良久靈臺閒辨折蓮舌逞頭目輕分毫心胸寬萬頃悟理能灼然時時拚企領

山居二首

世情曾不入欣已住山林會境猶非靜安居始覺深怪松多古意寒澗有清音一片峰頭白雲閒自在心何必學休糧松花飯自香衣裳縫糞掃註疏讀清涼怪樹留瘦古春藤引蔓長門前樵牧過曾不費迎將

和麗眉叟遊東臯有感

平泉綠野著寰中燠閣涼臺宛轉通錦漲港邊花墮雨絲垂池上柳拖風影來西嶺吹雲葉氣入清秋滴露桐萬里夢魂歸未得不堪欄檻漸消紅

爲南屏無生賦韻竹

紛紛草木繁惟竹韻不俗青鸞冒以姿翠鳳食其粟梢垂露夜鳴葉淨雨朝浴飄粉聞細香解籜放新綠况生舊南屏得近古乾竺梵香裊孤林佛火逗深曲涼添僧夢閑聲透野歌續智閑擊邊通中郎仰時錄苟爾無衆韻曷取君子竹况有伶倫知快刀剪青玉孤吹律呂和春風薦寒谷頗疑斬萬竿世人豁心日生公胡爲者保持意彌篤冬春色不改炎冷志莫辱遊戲坡仙禪妙味玉板足不妨遶簷衡相當寓蟾旭真如憑眼看法要恣風觸想彼境中人對此了無欲

大風不及送月在南遊先有詩見寄經旬始答
共客南湖日當春君遠遊天風違把袂江水憶行舟獨夜
吳中寺經旬白下樓解歌巴里曲高唱未能酌

泊婁江

星月照無際水天光一如城門司鑰早夜鼓報更遲燭影
搖歸夢潮聲雜誦書何爲峰頂客行役尚舟居

經練川

人烟疎密處獨我一舟來麥熟民情足花明客思開樹欹
枝接岸亭廢土爲臺去去從回首東行憶渡杯

練川東溪

獨行溪上路人物未凋殘正厭風塵苦能逢土地寬水深
魚聚樂林茂鳥歸安莫問今何世愁君起浩歎

寄道開時遊金陵

本是蓮花客而居文史間望因先輩得交許上流攀僧傳

隨年補松門約歲還數行他不及道我住閒閒

蟬

聞此別寒暑一聲無異同易教閒夢醒偏覺晚吟工清爲
食風得生因吸露窮丈人承不得接響綠楊中

華家見桃核佛像精巧無比瞻禮殷勤賦詩贊歎
寸許具神變良工盡巧思蓮花承寶足螺髻卷青絲相海
織毫得身光次第宜如何微物內無限出神奇

壽定觀禪師

身形如鶴具威儀忍草靈花總道機香積不煩天送供水
田無事客留衣眉垂雪色棲禪久爐冷香紋出定稀德業
兩高應覺後長留人世作皈依

寄壽壘卿范太濛

東山棋酒鄴侯書况復聲名著八廚德業有餘歸大老文
章無價屬通儒今稱國瑞爲靈鳳向覲天顏化玉鳧好立

股肱經濟事逢瀛珠樹且休圖

吳去塵黃奉倩沙白眠同過南軒問義

喜有四方士相尋破我閒德高歸白社景勝說黃山般若
推無我楞嚴辨不還文殊臺畔侶慧業頗相關

甲申除夕

更移頻剪燭歲盡兩朝分明年改元在夢休占夢居群不亂群
無心施法雨是處卷身雲正與窮爲友何須送有文

十憶詩有序

予所隸寺名曰智林唐乾元年間所建殿廊宏麗祇樹修
森旁列子院有七子院在東北隅其中園林花果流泉浴
池無不畢具會波旬相擾不遑安居百里肩囊永與之隔
然萍漂梗泛歲去時更流轉客途追思宿習往往想中如
影來去因物命篇謂之十憶

憶園

舊院存餘地爲園豈不宜栽培皆得性紅紫各乘時春蝶
過墻急秋蟲翳葉悲兔葵應滿眼荒廢復誰治

憶樓

百尺俯群象危簷出半天手捫星斗近耳聽雨風偏秘錄
懷貞白爲吟憶仲宣更無登嘯者經歲鎖荒烟

憶池

水聚群魚樂人同濠上遊捲萍風洗鏡沉荇雨添漚菰濯
禪心淨經行倒影浮如輪蓮落盡青豆晚誰收

憶石

愛此雲根古移歸不憚勞嶙峋皆雨蘚卷湧似春濤平可
安禪帶堅能礪戒刀未曾歸有力片片臥蓬蒿一作向有
米顛癖嶙

峒遠覓奇影蹲疑善虎形立化行夔小憩爲
林穩高談作座宜而今誰護惜突兀伴荒碑

憶樹

古德栽雙樹將參霄漢邊蜿蜒龍骨蛻盤覆鶴巢偏落葉

鳴秋雨靈風響梵天可能同散櫟容以不材全一作挺生
唐代樹其
陰佛慈同化特將投水為虬欲上空高蒼風
易吼蒙密月難通去去為陳物誰跌雙影中

憶竹

數竹猶成趣脩脩况百竿晚天歸暝易暑月受涼寬一畝
烟無際孤燈雨有端麓才云杜牧只作萬夫看

憶桂

子落垂垂葉香飄細細花滿庭開寶粟匝地影青霞能入
騷人咏難為貴客誇憑今秋色裡攀折向誰家

憶橘

傍林三兩樹敢曰滿千頭金色懸朝旭人烟媚晚秋仙翁
曾避世蘇子舊名洲玉液能消渴迢迢何處求

憶書

百一曾無好唯書千卷餘亂床翻乃爾繞座樂何如俗想
玄銷得塵心理掃除苦無終老地徒慕載三車

憶琴

鏗鏗堂上樂不與衆絲同清夜彈蘿月幽齋撫蕙風子期
情最得中散妙能通無復隨身去終為爨下桐

乙酉元旦

與目山川異驚心節物同曉光明蕙草禪意付梅叢欲灑
新亭泪難忘故國風太平何處告彷彿鳥聲通

次韻和承天朗如乙酉元旦二首

龍憶鼎湖去春看鳳曆來野人同木石朝客失鹽梅鹿夢
終疑幻羊腸舊說危悠悠非樂土海外訪僧回

未量身世事聊喜改元初與爾皆閒曠看吾獨懶疎錫依
雲外侶書滿竹閒居水澤饒吳地聲通西塞漁

海潮菴次子晉東海遊韻

幾重海樹蔭如雲學道高僧畏六群既曰反聞聞性寂海
潮雖大不聞聞

與公見示金陵遊記

雨華臺上雨華時說法高僧武帝師
六代興亡天眼裡顏宮廢院有豐碑

正月晦日喜子晉壁甫過宿北禪

剪燭欣相對還疑夢寐中洗鷗傾乳白
撥火養鑪紅交久情偏洽吟長句自
工偶談當世事人物想江東

答惟止道兄

不寄春江雙鯉魚爲焚筆硯懶修書
香雲席上纔交臂花雨壇邊又接裾
歸去且遲飛絮後住來當過落梅初
早傳心印根先熟法要應須一起余

山居漫成

向有蓮花性恒居清淨中孤燈明樹
雨獨閣響山風變相原非一無情不
盡同任荒門外路終老不求通

詠竹

虛心待磨琢高節保丰姿昔重黃金
種今栽碧玉枝露垂成細響月轉畫
脩眉不斲漁竿用留爲鳳鳥儀

贈三昧律師

諦將真俗析秋毫舉國人稱道價高
寶蓋贈時慈后禮紫衣賜日聖君勞
德威衆仰星羅月雄辨聲聞海涌潮
自喜焦牙沾一雨三根誰不受薰陶

山居

入春禽對語過雨水相聞每坐堦前
草閒看嶺上雲樹搖廳竊果花落鹿
追群長任青苔厚無勞枉俗賓

鶴聲

忽聽中宵唳群音總不如骨驚松露
滴翎喜竹風梳華表傳言迥琴中動
操徐上方鐘梵寂隱隱月斜初

和陸兆登池上卽事二首

夜叉頭彷彿隔岬古樓欄藥暖鼎餘
火簾開風動書去官

辭墨綬佐飯進黃齏擊石歌無已憂心卒未除
琴書長作伴雜客不能交菊謝英充藥松存鶴定巢官歸
安止酒屋老學誅茅懶把玄經著何心作解嘲

次韻答蘇子后見壽二首

初善將心轉法華能除界外惑塵沙礪邊早晚堪尋蕨石
上春秋謾種花悟去禪機明狗子渴來甘水酌蝦蟇世間
隨順都無礙不用孜孜辨佛魔

門外常年倒剎竿世緣不待近闌珊閒情有賦因招亮古
譯難看頗畏安芳樹花時多著暖長松青在獨禁寒下籤
疑義從君問瓶瀉寧言答未閒

蠟梅

名與羅浮一香兼色不同曉粧金屋內春信蠟丸中既自
餘黃額將無薄素衷可憐調鼎意何處問春風

十六夜二首

燈花不結雨侵涼夜景蕭蕭似異鄉酬句枯腸嫌瑟縮檢
禪新錄厭分張信衣數付排肩去素髮頻添暮地傷茶淪
徑山能解睡短檠挑盡聽更長

三五二八無月明此宵陰雨尚冥冥故人遠住今何似獨
我閒吟也不經畢世素心無可說一生老眼向誰青訓狐
野冢巢深樹徹夜啾啾不忍聽

楊無補南歸同文彥可見訪北禪

倦遊曰歸隱家住吳閶門雖聞姓字久未共詩書敦喜同
故人至樂與高懷言能薄愛染否晏息來僧園

子晉席上詠萱筍

罷遊夜叙出盤匱色翠香清味亦奇曰藿曰藜嘗頗慣非
萋非薤見堪疑齒牙咀嚼宮商川腸胃充盈烟火遺從此
百憂都忘却何須仙草覓人芝

次韻答仲威見懷

幾年燈下罷論心彼此傳聞學道深五色不教迷慧眼仲
向疾千聲容易感秋林輸君擊鉢成長句媿我撚鬚鍊短

吟已遂買山山有地肯來添築不須尋

丙申作集所不載刻成得
之東林禪侶因附于此

學佛乃精勤世務無所顧未了塔廟功遽承彌勒度永出

生死關坦行涅槃路說偈而知時末後聊顯露師於歿前

書偈云人生如夢倏忽便老六十六年一事未了囑付後
賢切須向早已復檢曆云丙庚卯乙初不解其意及歿時
乃知其預定時日為丙申歲
庚寅月甲午日乙亥時也

詩卷上終

德